

† Sep Antoni Monn-Maissen, Rueras

(Corr.) Tgi che ha la veta, ha la mort. — Quei factum san ins veser ed udir mintga di. Mo ei dat era da quels che san ed astgan haver ina liunga veta e puspei auters che van mo cuort atras lur cuors della veta. Tut sco Dieus ha destinau gia dalla entschatta da mintga veta humana. Ed aschia havein nus saviu veser e seperschuader, che il defunct Sep Antoni ha astgau vegnir sin ina vegliadetgna patriarcala cun ses 86 onns. Annunziond il zenn da miert la mort de nies convischin ils 5 d'uost 1978, la mort de Sep Antoni Monn da Rueras/Sedrun, ha il preziau defunct astgau returnar sia olma a siu suprem scaffider en tutta ruasseivladad e bein satisfatgs per quei mund e per l'arrivada en la perpetnadad.

Il Sep Antoni Monn, el vegneva numnaus il Sep Antoni de suloms, a Rueras, ei naschius ils 30 da zercladur digl onn 1892, e quei sco il Benjamin ded 8 fargliuns ed ei staus ensemen cun ses buns geniturs e fargliuns en il menaschi puril. Da lezs onns deva ei depili de semudergiar. Mo ins fuva era cuntents cun sia sort. Denteren mava il Sep Antoni era aunc suenter autras lavurs che sepurschevan ed ei empurtava era nuot al Sep Antoni, che la lavur seigi biala ni meins biala. — Basta, ch'ei vegnevi in pèr raps aunc dasperas. Il Sep Antoni, inagada staus carschius si e daventaus in um plein forzas, sche ha el nuota stuiu tumer ded era sez fundar ina famiglia. Ed aschia eis el staus maridaus duas gadas. La ventira cun sia emprema consorta ha buca cuzzau aschi ditg ed aschia eis el staus anavos cun in affon. Mo era cheu ha il preziau defunct buca schau dar las armas, ed ei sefidaus de quel sisura cun la devisa: ura e lavura, sche gida Tei Dieus. —

E co las vias dil Segner ein savens miraculas e per nus humans savens buca capeivlas. La lavur ha carmalau il bien Sep Antoni tochen en la biala val Sumvitg. Ed entras quella lavur ha el puspei saviu far enconuschiantscha cun ina stupenta matta da Surrein/Sumvitg. E quella ha el puspei astgau menar agl altar dil Segner en la persuna de Georgina Maissen, ch'ei stada per el ina bona consorta e cumpogna della veta. Ils 27 da



november 1930 han els serrau lur ligia matrimoniala. Ed ord quella lètg eisi sortiu 3 buobas e 4 buobs, ch'ein oz tutts en bunas relaziuns, e bragian sper la fossa de lur aschi car e bien bab e consort.

Igl onn 1974 era il preziau defunct sere-tratgs — ensemen cun sia cara consorta — egl asil e casa de S. Vigeli a Sedrun per leu saver prender in pèr bials onns de ruaus de sias stentas dalla lavur prestada. El sesenteva sco da casa a Sedrun, e las soras havevan leu quitau per el e per tutt confidai ad ellas. Era fuva il defunct il senior della val Tujetsch dils umens. Da quei haveva el in cert quet ed astgava era haver.

Sche il defunct ha giu de sbatter cun la sanadad, sche ei quei segir stau il mender tier sias combas. Per igl auuter ha el giu ina sanadad de fier. Era ha el buca stuiu star rentaus ditg en letg che el ei vegnius liberaus dases malst terresters. Ils 7 d'uost, il di che il Sep Antoni ei vegniu surdaus alla tiara benedida, ha la gronda fuola de glieud exprimiu la gronda stema che il defunct gudeva. Als restai anavos, a sia consorta ed als affons admettein nus nossra pli sincera condolientscha, ed ad el giavischein nus il rauus perpeten. G.F.